

CONVENIO DE COLABORACIÓN ENTRE A CONSELLERÍA DO MAR E CAIXA GALICIA SOBRE O FINANCIAMENTO DO PROGRAMA EUROPEO DOS GRUPOS DE ACCIÓN COSTEIRA

En Santiago de Compostela, a

REUNIDOS

Dunha parte, a Sra. Dona Rosa María Quintana Carballo, Conselleira do Mar da Xunta de Galicia, segundo o Decreto 81/2009, do 19 de abril (DOG nº 75, do 20 de abril de 2009), polo que se nomean os titulares dos departamentos da Xunta de Galicia, actuando no seu nome e representación, ao abeiro das facultades que lle concede o artigo 34 da Lei 1/1983, do 22 de febreiro, reguladora da Xunta e da súa Presidencia,

E da outra, D. José Luís Méndez López na súa condición de Director Xeral da entidade Caja de Ahorros de Galicia (en diante, Caixa Galicia).

Ambas partes recoñécense reciprocamente capacidade legal para outorgar o presente convenio e, a tal fin,

EXPOÑEN

Primeiro: A Consellería do Mar ten encomendadas, entre outras, as funcións de impulsar a formulación e aplicación a nivel das zonas de pesca, definidas no artigo 2 da Orde do 17 de xullo de 2008 pola que se convoca concurso de selección de grupos de acción costeira (DOG nº 144, do 28 de xullo de 2008), de estratexias de desenvolvemento local integrado, en especial mediante a dinamización e coordinación de grupos de acción costeira (GAC) encargados da súa elaboración (a través dos seus Plans Estratéxicos Zonais – PEZ-) e execución, así como de xestionar as medidas e actuacións que se lle encomenden no marco da programación 2007-2013 do Fondo Europeo de Pesca (FEP). No marco desas funcións vai executar actuacións no eixe 4 do Fondo Europeo de Pesca, a saber, "Desenvolvemento sustentable das zonas de pesca".

Segundo: Que Caixa Galicia está interesada en participar nas actuacións postas en marcha pola Consellería do Mar de apoio ás zonas de pesca a través do programa dos Grupos de Acción Costeira (GAC).

Xa que logo, de acordo con todo o anteriormente exposto, habida conta do interese común de ambas as dúas partes, a través do presente convenio preténdese articular un marco de colaboración con suxeición ás seguintes:

CLÁUSULAS

Primeira.- Obxecto e ámbito territorial do convenio.

O obxecto deste convenio é establecer, no ámbito territorial de Galicia, a forma e condicións nas que deberá desenvolverse a colaboración entre a Consellería do Mar e Caixa Galicia para a instrumentación de liñas de financiamento a interese preferente vinculadas ao programa dos Grupos de Acción Costeira do eixe 4 do Fondo Europeo de Pesca.



Segunda.- Liñas de financiamento.

Caixa Galicia comprométese á creación dunha liña de préstamos, por importe de até 80 millóns de euros, destinada especificamente tanto ao financiamento de empresas e particulares beneficiarios do programa dos Grupos de Acción Costeira, así como aos propios GAC.

Terceira.- Período de vixencia.

A duración deste convenio será a do período de programación, 2007-2013, sen prexuízo da posibilidade de revisión das súas cláusulas anualmente.

As condicións financeiras recollidas neste documento poderán ser revisadas, á alza ou á baixa, sempre que as variacións nos mercados financeiros así o xustifiquen, cun preaviso dun mes entre as partes.

Cuarta.- Compromisos da Consellería do Mar

A Consellería do Mar comprométese a realizar unha ampla difusión deste convenio entre todos os Grupos de Acción Costeira, que a súa vez, como entidades colaboradoras da Consellería do Mar na xestión e control do eixe 4 do Fondo Europeo de Pesca, difundirán o mesmo entre os beneficiarios de axudas do programa dos Grupos de Acción Costeira.

Quinta.- Compromisos de Caixa Galicia.

Caixa Galicia aplicaralles aos GAC do programa dos Grupos de Acción Costeira as condicións financeiras recollidas no **Anexo I** a este convenio titulado "**Condicións financeiras para os GAC do programa Grupos de Acción Costeira**".

Caixa Galicia aplicaralles aos beneficiarios do programa dos Grupos de Acción Costeira as condicións financeiras recollidas no **Anexo II** a este convenio titulado "**Condicións financeiras para os beneficiarios do programa dos Grupos de Acción Costeira**", os cales deberán achegar unha vinculación comercial suficiente.

Caixa Galicia, a través dos orzamentos da súa Obra Social destinados ao apoio dos sectores produtivos, contribuirá a impulsar e desenvolver aquelas iniciativas emprendidas polos GACs, que asinen convenios de colaboración con Caixa Galicia, e que teñan por obxecto promover as actividades dos seus asociados, até unha contía máxima anual de 500 €, para cada GAC.

Así mesmo, e para artellar a colaboración prevista no anterior parágrafo da cláusula, os GAC's dirixirán solicitude expresa á Obra Social de Caixa Galicia, indicando os fins específicos da mesma. Nesta caso a Obra Social de Caixa Galicia, aplicando os criterios habituais de selección de proxectos, accederá ou non á sinatura do convenio de colaboración.

Sexta.- Compromisos dos beneficiarios.

Para poder acollerse a calquera das liñas de financiamento especial detalladas na cláusula precedente, os beneficiarios deberán xuntar á súa solicitude a xustificación necesaria de estaren acollidos ao programa dos Grupos de Acción Costeira. En todo caso, Caixa Galicia poderá aprobar ou rexeitar as solicitudes de financiamento que lle sexan efectuadas ao abeiro deste convenio,

conforme aos seus propios criterios de valoración de riscos e, no seu caso, esixir as garantías adicionais que considere axeitadas.

Sétima.- Comisión de seguimento.

Co fin de conseguir a maior operatividade na aplicación deste convenio e velar polo axeitado cumprimento dos seus obxectivos, constitúese unha comisión de seguimento, integrada por dous representantes designados por cada unha das partes.

As funcións da citada comisión serán:

- Interpretar o contido do convenio e adoptar as decisións de carácter operativo axeitadas para a súa correcta aplicación.
- Efectuar o seguimento e avaliación dos resultados do convenio. Analizar posibles incidencias ou queixas de beneficiarios que teñan dificultades de acceso aos produtos amparados polo convenio.
- Servir de canle de diálogo sobre os asuntos que poidan ser de interese mutuo.

Oitava.- Natureza do convenio.

Este convenio terá natureza administrativa. Calquera cuestión que suscite a interpretación, aplicación e efectos deste convenio e que non queden resoltos pola comisión de seguimento será sometida á xurisdición contencioso-administrativa.

E para que así conste, en proba de conformidade asínase o presente convenio, no lugar e data sinalados no encabezamento.

Por Caixa Galicia,

Pola Consellería do Mar

Asdo: José Luís Méndez López

Asdo: Rosa María Quintana Carballo

ANEXO I

ANEXO I.- CONDICIÓN FINANCEIRAS PARA OS GAC DO PROGRAMA GRUPOS DE ACCIÓN COSTEIRA	xullo de 2010
--	---------------

FINALIDADE	PRODUTO	XUROS	COMISIONS	PRAZO	OBSERVACIONS
FINANCIAMENTO A CURTO PRAZO (12 meses)	PÓLIZA DE CRÉDITO PARA OS GRUPOS DE ACCIÓN COSTEIRA	EURIBOR (3 meses) + 1,50	FORMALIZACIÓN: 1.50 % NON DISPOÑIBILIDADE: 0% OTRAS COMISIONS: EXENTO	ATÉ 2 ANOS, CON RENOVACIÓN TÁCITA ANUAL	IMPORTE: ATÉ 20.000 €

As condicións financeiras recollidas neste documento poderán ser revisadas, á alza ou a baixa, sempre que as variacións nos mercados financeiros así o xustificuen, cun preaviso de un mes entre as partes

ANEXO II

ANEXO II.- CONDICIÓN FINANCEIRAS PARA AS EMPRESAS E PARTICULARES BENEFICIARIOS DE PROXECTOS VINCULADOS AO PROGRAMA DOS GRUPOS DE ACCIÓN COSTEIRA	xullo de 2010
---	---------------

FINALIDADE	PRODUTO	XUROS	COMISIÓNS	PRAZO	OBSERVACIÓNS
FINANCIAMENTO	PÓLIZA DE CRÉDITO DE ANTICIPO DE SUBVENCIONS	EURIBOR (3 meses) +1,50	FORMALIZACIÓN: 1,50 % AMORTIZACIÓN ANTICIPADA:0% CANCELACIÓN ANTICIPADA: 0%	ATÉ 12 MESES, prorrogable no seu caso por 12 MESES ADICIONAIS	LIQUIDACIÓN TRIMESTRAL BANDA FLUTUACIÓN: 4,00% - 15,00% IMPORTE MAX. ATÉ 100% SUBVENCIÓN IMPORTE MÍNIMO: 10.000 EUROS GARANTÍAS: CESIÓN E DOMICILIACIÓN IRREVOCABLE, EN CONTA ABERTA EN CAIXA GALICIA, DAS SUBVENCIONS ANTICIPADAS
FINANCIAMENTO A LONGO PRAZO		EURIBOR (3 meses) + 2.75%	FORMALIZACION: 1,50% NON DISPOÑIBILIDADE: 0%	ATA 5 ANOS	BANDA FLUTUAC.:4,00 % - 15,00%
AVAIS	AVAIS		COMISIÓN RISCO AVAL: 0,50% TRIMESTRAL		

As condicións financeiras recollidas neste documento poderán ser revisadas, á alza ou a baixa, sempre que as variacións nos mercados financeiros así o xustifiquen, cun preaviso de un mes entre as partes.